




古那撰述


石門文字禪
卷一
二




~ 16
1123
1



明和 6
番 1123
巻 1



子一七



皇圖鞏固 帝道遐昌
佛日增輝 濃輪常轉

石門文字禪序

夫自晉宋齊梁學道者爭以金屑翳眼而初祖東來
應病投劑直指人心不立文字後之承虛接響不識
藥忌者遂一切峻其垣而築文字於禪之外由是分
疆列界剖判虛空學禪者不務精義學文字者不務
了心夫義不精則心了而不光大精義而不了心則
文字終不入神故寶覺欲以無學之學朝宗百川而
無盡歎民公南海波斯因風到岸標榜具存儀刑不
遠嗚呼可以思矣蓋禪如春也文字則花也春在於
花金花是春花在於春全春是花而曰禪與文字有

二乎哉故德山臨濟棒喝交馳未嘗非文字也清涼
天台疏經造論未嘗非禪也而曰禪與文字有二乎
哉逮於晚近更相咲而更相非嚴於水火矣宋寂音
尊者憂之因名其所著曰文字禪夫齊秦構難而按
以周天子之命令遂投戈臥鼓而順於大化則文字
禪之爲也蓋此老子向春臺擷衆芳諦知春花之際
無地寄眼故橫心所見橫口所言鬪千紅萬紫於三
寸枯管之下於此把住水泄不通卽於此放行波瀾
浩渺乃至逗物而吟逢緣而咏竝入編中夫何所謂
禪與文字者夫是之謂文字禪而禪與文字有二乎

哉噫此一枝花自瞿曇拈後數千餘年擲在糞掃堆
頭而寂音再一拈似卽今流布踈影撩人暗香浮鼻
其誰爲破顏者

明萬曆二十五年歲在丁酉八月望日釋達觀撰

卷之十二
五言對語
卷之八
不問文字觀目驗

石門文字禪目錄

卷一之八

古詩

卷九

排律 五言律詩

卷十之十三

七言律詩

卷十四

五言絕句 六言絕句

卷十五之十六

七言絕句

卷十七

偈

卷十八之十九

贊

卷二十

銘 詞 賦

卷二十一之二十四

記 序 記語

卷二十五之二十六

題

卷二十七

跋

卷二十八

疏

卷二十九

書 塔銘

卷三十

行狀 傳 祭文

目錄

終

石門文字禪卷第一

宋江西筠溪石門寺沙門釋德洪覺範著

門人覺慈編錄 西眉東巖旌善堂校

古詩

謁狄梁公廟

九江浪粘天氣勢必東下萬山勒回之到此竟傾瀉
如公廷諍時一快那顧藉君看洗日光正色甚閒暇
使唐不敢周誰復如公者古祠蒼煙根碧草上屋瓦
我來春雨餘瞻歎香火罷一讀老范碑頓塵看奔馬
斯文如貫珠字字光照夜整帆更遲留風正不忍掛

明治四十二年三月六日
久保田實宗氏寄贈

謁蔡州顏魯公祠堂

開元天寶政多暇孽臣姦驕濁清化尺八橫吹入醉
 鄉國柄倒持與人把漁陽番將易漢官在廷之臣無
 諫者
 錦光照眼更覺霓裳韻和雅叛書夜到
 華清宮狩呂骨驚天子訝二十四城陷同日長嗟乃
 爾忠臣寡開傳平原城壁堅穴鼻可以牯牛馬譬如
 灩預屹中流江勢遠來波倒射吾知守職事王耳行
 藏初不較用捨公時風姿入睿想貫日精誠震天下
 我行上蔡黃犬門驚風急雪吹平野嬌鳴暮集村不
 踰古祠窈窕連桑柘聖朝亦旌異代忠軒然眉鬚入

圖畫和如戲泚盧杞題儼若夢令希烈怕至今握拳
 透爪地想見怒詞猶慢罵聲光自與日月爭事之成
 敗其天也此詩我欲掃東壁入字端宜壁窠寫便覺
 雲收六合陰春隨喜色生晴野

同彭淵才謁陶淵明祠讀崔鑒碑

武王既伐紂乃不立微子雖有去惡仁終失存商義
 夷齊不肯臣甘作首陽死下視莽操輩欺孤奪幼稚
 汗面亦戴天特猴而冠耳桓公弄兵權劉裕竊神器
 先生於此時抽身良有以袖手歸去來詩眼飽山翠
 追還聖之清太虛絕塵滓長恨千載心斷絃掩流水

崔子果何人賞音乃知此與君讀此碑相視一笑喜

題李愬畫像

淮陰北面師廣武其氣豈止吞項羽君得李祐不肯
誅便知元濟在掌股羊公德化行悍夫卧鼓不戰良
驕吳公方沈鷲諸將底又咲元濟無頭顱雪中行師
等兒戲夜取蔡州藏袖裏遠人信宿猶未知大類西
平擊朱泚錦袍玉帶仍父風柱願長劍大梁公君看
韃橐見丞相此意與天相始終

同景莊游浯溪讀中興碑

上皇御天功最盛生民温飽卧安枕醉凭艷姬一咲

適薄夫議之無乃甚長安遮天胡騎塵潼關戰血深
没人哥舒臣賊不足惜要變國忠如膾鱗蒼黃去國
食不暇馬嵬賜死謝天下反身罪已成湯心奈何猶
有譏之者取非其子又遽忽靈武君臣無忤容何須
嗚咽讓衰服自控歸鞍八尺龍誰磨石壁湘江上楷
拭雲煙滅驚浪龍蛇飛動忠義詞顏元色莊儼相向
與君來游秋滿眼閒行古寺西風晚道人興廢了不
知但見游人來讀碑

陳氏貫時軒

春風著萬物粉飾相明鮮雪霜摧壓之不情如世權

問誰不可犯，揖此蒼王椽。斫頭未易屈，槍地猶傲然。
 相逢凋零中，秀色披晴煙。陳侯我輩人，逸氣傾群賢。
 開軒冷相對，酬酢忘歲年。我來作風聽，夜雨雜山泉。
 携被願假宿，與子對牀眠。

洞山祖超然生辰

希郎真吾道，門友初見忘。年今耐久，天機深穩道骨。
 清詩句誰令，樗人口可憐。佳處未全知，但見茲篇氣。
 渾厚我生癡，魯人所棄洞。視曾中了無，有但忻所至。
 有青山依倚，叢林遮百醜。君才一籌勝，却我胡為包。
 腰反隨後人，生嗜好調自。殊海上舊聞人，逐臭江南。

長憶好雲泉，今日雲泉長。入手萬頃蒼然，几按間作
 詩舉以為君壽。理毫聊為試冰華，小字明牕看揮肘。

懷慧廓然

蕭蕭暑雨過，空山成夜晴。月出東南峯，娟娟風露清。
 飛螢自開合，寒蟬亦悲鳴。興來忽獨往，聽此落礮聲。
 永懷西湖上，絕景玉壺明。松際倚然姿，振策自經行。
 即欲呼就語，忽隔千里程。何時徑尋子，夜航過臨平。
 呼猿何足道，塵雲亦虛名。未若擇法眼，能識廓然兄。
 應知像教末，大法欲歌傾。談笑復一出，要使萬世驚。
 燈火作朝夕，已有相似情。願隨人天會，仰看辯縱橫。

同超然無塵飯栢林寺分題得栢字

沙村宿雨餘炊烟淡寒色山墟蠶市休野飯漁舟隔
 忽逢柳際門知有道人宅扣扉山答響童子出迎客
 空庭竟何有凍死千歲栢鐘鳴食時至老僧揖就席
 香杭定宿春露葵應曉摘羌飢一飯美何啻萬錢直
 風軒納山翠引手捫石壁愛此玉崔嵬歲久自崩折
 下有洄渦泉甘涼冰齒頰勿輕一脉微去漲萬頃澤
 吾行無疾徐住佳去亦得欲收有聲畫絕景為摹刻
 興來勿復緩轉顧成陳迹

次韻超然游南塔

遶塔不忍去新涼生早秋不見江西月一水空悠悠
 龕燈耿晝影遺像青雙眸永懷皇祐間曾此狎沙鷗
 往事已陳迹豐碣撐高樓公昔從吾祖來往亦風流
 但餘松菊在井臼遺林丘高風不可攀落日令人愁
 倚杖哦清詩溪風波白頭脉脉不能語歸心浩難收
 今已不如古無復相綢繆何當効船子華亭從釣舟
 大雪戲招耶溪先生鄒元佐

昨夜顛風吹裂石曉來雪片大如席耶溪先生醉不
 知擁絮雷霆喧鼻息癡奴搥門呼不應但聞含糊語
 呵叱先生行世如行川虛舟觸入無怨言逢人覓錢

即沽酒得錢不謝猶傲然我欲看君墮憤醉便覺兩
頰微渦旋欵段自能馱醉起歸路逆風吹凍耳入門
兒女啼飢寒瞪目矐然作直視

送英老兼簡鈍夫

靈源道價壓四海骨相正似陳睦州去年龍山同坐
夏時君亦來從我游開傳詩膽抵身大時吐佳句凌
湯休故山歸去恰千里靈足過我不肯留行看海上
荔子熟落枝丹顆無人收應共鈍夫行樹下未輸分
柿獨風流

次韻龔德顏柳帖

顏柳以字名畫畫法可究後世何寂寥此輩了無有
皆云學未至妙不應心手那知斯人徒德高名往就
字工德不修名與身俱朽吾子佳少年俊氣駒方驟
新詩作行草開軸龍蛇走坐客口為愕我亦知有首
積墨如陂池積筆高隴阜學之不至顏要亦終至柳
此詩聞東坡請君書座右

神駒行

沙丘牝黃馬已死俗馬千年不能嗣忽生此馬世上
行神駿直是沙丘子紫燄爭光夾鏡眸轉顧略前批
竹耳雪蹄卓立尾蕭梢天骨權奇生已侶綠絲絡頭

沫流紫繡帕搭鞍初結尾決驟意態欲騰驤奔逸長
鳴抹千里

桐川王野夫相訪洞山既去作此兼簡直夫

野夫加於人一等玉骨春容含秀整已驚詞源倒三
峽會看聲名重九鼎江南盡處山作堆雨餘青碧數
峯開那知萬壑千巖處風帽寒驢能獨來鳳凰鸞鷲
未入眼今識鷓鴣猶恨晚與聞掉頭不肯留出門去
袂聊一挽君家富貴若騎虎擁鼻未免非虛語何當
解帶食太倉時時携被宿玉堂

贈范伯履承奉二子

大范風月湖小范煙雨柳清明與秀徹風度隨付受
醉闌看落筆已覺風助肘聲名定追尋公卿在懷袖
江湖方縱浪第未一唾手乃公幹國器議論在人口
謫居長閉門藥方曾校否著書亦細事用舍付杯酒
君看雨園鳩雨晴定呼舊

贈汪十四

石麒麟兒天上物英姿秀徹氣超忽我非寶公亦識
君嘉期半千知一出五色毫端欲飛動萬卷胸中正
撐突會當談笑取卿相先看唾手斫月窟詞鋒堂堂
無筆陣人笑我頑取纓紱昨日賡酌一百篇遶紙風

雷出倉卒我詩拙惡未全貧君語定知窮到骨朝來
爽氣西山高倚杖風流如狂芻祇恐與君汗漫游共
跨長鯨過溟渤

贈蔡儒効

我家與君鄰屋居君昔未生先長我君髮齊眉我總
角竹居讀書供日課君誦盤庚如注瓶我讀孝經如
轉磨長老奇君王佐才拭目顛顛觀長大十二環坐
同賦詩出語已能驚怯懦風雷遶紙成千篇棄遺不
惜如零唾神思義表文融明清絕如珠不受泥江左
相傳紙價增東坡一讀不復和懷高識遠不可屈功

成回首破甑墮家貧口衆難自安出圖斗粟充飢餓
開闢筆陣掃萬人上國英雄膽先破殿前作賦聲摩
空盛名四海爭掀播華裾如葱馬如龍九衢突若流
星過我經憂患早衰微生怕虛名招實禍方衣童首
住江村飽飯愛尋閒處卧睡餘信手摸書看會意起
來行復坐林泉成趣亦題詩年來藁帙成堆塚仙郎
開卷面發光誇我雄詞驚李賀相期他日同此遊先
買鄰庵山數朶青松白石聞此言共作廬山二十箇
豆粥

出碓新秬明玉粒落叢小豆楓葉赤井花洗秬勿去

耳沙瓶煮豆須彌日五更鍋面漚起滅秋沼隆隆踈
 雨集急除烈焰看徐攪豆才亦赴河渦入須臾大杓
 傳淨甕浪寒不與色如粟食餘偏稱地爐眠白灰紅
 火光濛密金谷賓朋怪咄嗟蔓亭君臣相記憶我今
 萬事不知佗但覺銅瓶蚯蚓泣

十二月十六日發雙林登塔頭曉至寶峯寺見

重重繪出庵主讀善財徧參五十二頌作此

兼簡堂頭

十年懷石門今日石門去雙林動曦光跋河開宿霧
 力微藉古藤泥軟脫芒履風泉白雲壑夜雨青松路

我生百事廢齒髮行衰莫但餘愛山心不逐年華故
 此山甲天下自昔家吾祖峯如青蓮花千葉曉方吐
 煙雲浮香色清涼洗肝腑異哉萬木間白塔歸然古
 此老無恙時超放殊媚嫵萬象供談笑大千為戲具
 我曾從之游絕塵追逸步誰云今已亡塔開全體露
 永懷憑妙觀此意竟淒楚那知深林間聊與故人遇
 電眸霹靂舌咳唾成妙語筆端撼江海千偈浩奔注
 人間有此客自可忘百慮堂頭百衲師疑疑法王輔
 君看說禪口未肯讓前古夜闌對昏燈豪邁激頑魯
 相逢俱偶然此生真逆旅何當各努力業已共騎虎

詩成對軒渠，一笑小天宇。

留題三峯壁間

三峯稜層如削玉，一派懸泉瀉寒綠。平生山水性貪
婪，聊與白雲相伴宿。松風竹露有餘清，夜伴孤月依
簷楹。神凝氣爽睡無夢，不聞樓上霜鐘鳴。庵頭禪翁
頭雪白，麻衣草履提筇策。謂予久與世緣疎，青眼逢
迎喜詩客。三峯高兮溪水深，造物留之無古今。新生
松竹不須剪，四時風露常蕭森。粥罷收盂知我去，殷
勤乞與題詩句。山頭塵土任茫茫，白雲自在來時路。
華光仁老作墨梅甚妙為賦此

雪裏梅開何草草，欲問清香無處討。回看水際竹叢
邊，寂寞閑愁洗粧早。東坡戲作有聲畫，竹外一枝斜
更好。但恐金鬚容易墮，額黃雖妙難長保。笑笑先生
獨愛竹，雪壁風梢麝煤掃。應為冰姿不可傳，醉裏相
忘亦顛倒。慚愧高人筆下春，解使孤芳長不老。從來
病眼錯黃昏，隔霧相看更相惱。

仁老以墨梅遠景見寄作此謝之二首

荒寒掃橫斜，稀疎開未徧。煙昏雨毛空，標格終微見。
吳姬風鬢亂，睡色餘妬面。誰令種性香，風味極不淺。
道人三昧力，幻出隨意現。塞管玉纖寒，無勞寫哀怨。

○數筆何處山，領略分樹石。遠舍千里姿，間見復層出。我本箇中人，慣卧蒼崖側。借路行人間，勃土相欺得。那知一幅中，見此晚秋色。悠然欲歸去，遠壑誰同陟。有人笑絕纓，捲卷成陳迹。

上巳日有懷昔從雲庵老人此日山行

今年上巳日，久客望江南。雙林接脩水，石路入煙嵐。千峯出雲雨，空谷吞寒潭。蒼杉鬱童童，秀色動雲庵。不見庵中人，青燈耿塵龕。空餘行樂處，攀翻聞笑談。風光與節物，觸愁味參參。臨高望煙靄，衰涕落春衫。次韻胡民望小蟲墮耳

先生素坦率，元日慵拜賀。獨從耶溪翁，掩門作清坐。一尊對喧譁，酒酣巾幘墮。忘形到挽鬚，困倒相枕卧。一蟲輒墮耳，忽覺風雨過。隆隆竟不已，亟起呼燈火。頗疑含沙流，射影陰中禍。蟲亦意墮井，咨嗟恨坎坷。豈曰無意出，欲出但未果。驚憂發清詩，怨語終婀娜。夫子英偉姿，奇韻出羈鎖。那知乘一醉，遭此微物挫。鬪螳真鬪牛，此事古亦夥。置之勿復疑，自可平物我。我詩無好句，聊復相唱和。恐亦有佳處，一笑千愁破。贈歐陽生善相

薛公衣尚敝，飢腸轉鳴雷。天子征遼東，細君笑靨開。

吾夫雖奇蹇一作本作吾要是高世材發必藉時耳今
 豈其時哉往見張將軍喜曰真吾儕三矢定天山英
 聲馳九垓房杜未肉食席門蒙積埃但餘王氏子文
 字相追陪賢哉太夫人智鑑照襟懷嘗自撫其子國
 鼎真鹽梅但未識其友試與俱而來窺窻見之喜亟
 使羅尊壘果見貞觀間相逐登二台予嘗閱舊史至
 此嘗徘徊數子初未貴踽踽蒿與萊而彼一女子底
 蘊遭窺猜何知婁師德碩大非栽培譬之萬頃波但
 見瑠璃堆倔強如梁公包撫等嬰孩掩卷發長想鄙
 吝為崩頽吾今著田衣百念如冷灰功名一破甌掉

臂首不回頗怪歐陽生諛語坐差排人生如逆旅歲
 月苦逼催懸知賢與愚終作土一坏美惡何足道君
 亦真恢諧愚賢君勿取吾肯罪形骸不肖君謂賢是
 適為吾哈重輕寧在子意子定癡歎所喜亦清散時
 時過茅齋明日念當行引紙研松煤詩成極醇醲蒲
 萄初撥醅

贈許邦基

邦基今年方十九美如濯濯春月柳龍章鳳姿絕世
 無金馬玉堂如故有酒闌愛捉玉麈尾玉色正同批
 誥手高燒銀燭擁新粧看君落筆龍蛇走欲驅清景

入秀句萬象奔趨不敢後人疑錦繡纏肺腸不然筆
端應有口謫仙風流今復見況亦彷彿外塵垢但恐
功名纏縛人未放青山掛窓牖

送正上人歸黃龍

道人泉南來音姿頗純美觀其略笑語亦自飽風味
相看坐終日孤月墮止水但見篆畦間青煙行未已
朝來忽去我秋風動衣袂試問安所之笑指千峯裏
秋晚當相尋結伴入層翠

贈吳世承

吳郎氣高明溫然見標格文章當世家風流走上國

清談落玉塵醉袖餘詩墨一種富貴韻綠髮映坐客
便覺儒生寒枯衰酸凍色解來古招提爐香伴禪寂
宗之果瀟灑壁門應夜直歲晏或來歸共理登山屐

次韻寄吳家兄弟

朱門連屬南昌郡東湖褒賢拔高峻西山卷簾入欄
楯富貴遮人不容進我初見之不敢瞬吳家諸郎特
風韻戲語嘲之終不愠筆鋒落處風雷赴冰華百香
一揮盡紅粧聚看眼波俊一堂喧闐客懽甚大厦吞
風簷月近君看渥洼本龍孕俗馬那能著神駿

香城懷吳氏伯仲

西山遭霧雨形勝久抑鬱雲開誰使令千峯為子出
 骨瑛淡如秋談笑極強促扶提登高閣慷慨問陳迹
 特欣曇顯醉不受澄觀律加額想諸郎豪氣洗寒乞
 新莊花成輪春生夢蝶室清境乃不游萬壑同稱屈
 洪崖清不殺笑傲時出沒路逢騎雪精挾以兩橘栗
 大雪晚睡夢李德修挿瓊花一枝與語甚久既

覺作此詩時在洞山

窮年踏黃塵旅卧每自鄙此山頗岑寂飲食亦清美
 瘦藤當一折且作終老計曉堂看春雪秀色淨窓几
 爐暖倚蒲團頽然成坐睡君從何所來會我清夢裏

瓊花斜裊帽眸子湛秋水伊予雜權笑應阿竟何事
 忽然長揖去驚覺在千里人生孰非夢安有昏日異
 心知目所見歷歷皆虛偽他日或相逢何殊開睫寐
 此詩當見渠一展笑相視

汪履道家觀所蓄煙雨蘆鴈圖

西湖漠漠生煙雨浦浦圓沙鳧鴈聚今日高堂素壁
 間忽見西湖最西浦翩翩兩鴈方欲下數隻飄然掠
 波去獨餘一隻方穩眠有夢不成亦驚顧蕭梢碧蘆
 秋葉赤青沙白石紛無數我本江湖不繫舟爾輩况
 亦江湖侶令人便欲尋春郎呼船深入龍山塢

蘇子平汪履道試李潘墨

南陽國師古禪伯玉殿以棊聊戲客客雖四海棊絕
 倫我解兩奩俱用黑侍臣大驚帝微笑客亦袖手吁
 莫測黑中優劣自能分正似蘇汪今試墨老潘氣韻
 凌阿寬二季不平有矜色坐令好事翁舍郎瞠視無
 言受巾幘我非南陽不能辨以手捫頭空嘆息徑當
 相攜詣瞽叟夜半一辨須明白

隆上人歸省觀留龍山為予寫起信論作此謝之

芙蓉阿隆耽兩耳急性天然緩如筆懷親徑歸不肯

留少留龍山今月矣新交未數故人稀睡足明窓寫
 棊几管城落帽為微笑便覺金光走龍尾試校鶯經
 拂硬黃傳此寶書千餘紙紙光葉葉揭筠膜字工戟
 戟行凍螳勝公昔讀龍宮文百本妙談此其髓流落
 人間今幾年此去西天十萬里我寄閑房古寺中間
 風著氊自當止自非道人三昧力此書何以能至此
 炷香一讀萬緣空海印發光初按指願君垢盡雞出
 罽亦於此法信根起生生要續無盡燈照了無明癡
 種子

送元上人還桂陽建轉輪藏

趙州飽叢林，懶憶亦慣便。起步作次伸，藏經終一遍。
投子猶可駭，手足未舒展。但於數字中，演出五千卷。
兩翁古禪伯，措置令人羨。安知塵塵中，法輪常自轉。
無數妙章句，函匭金碧眩。芥子瑠璃瓶，歷亂齊發現。
頗怪老龍華底事，別管建幻出。諸鬼物奇狀，分百變。
疾馳並推轂，過目等飛電。萬衆初錯愕，熟視生悲戀。
譬如觀寫照，筆下出眉面。爭貴紙上容，活者反棄賤。
乃知像教末，妙理蔽浮淺。要令齒髮輩，種性受熏煉。
元禪今南歸，酬此夙所願。我作送行時，敗墨磨破硯。
詩成一大笑，相顧春風軟。會看出談笑，錯落照深殿。

想見午梵清，隨喜時遶旋。

贈淨上人

金華上人牧羊，伴來尋江南。好山看西湖，毛骨漱秋
光。野鶴精神照冰段，嗟余塵事苦相羈。槁項蒼顏老
路岐，二年來往南州浦。古寺閒行三見之，生涯初不
受塵垢。到客踟躕聽秋雨，玉軸已閒經半掩。銀葉未
寒煙一縷，雲泉佳處包當解。未暇從人覓錢買，不嫌
高笑常垢汙。與子俱載歸東吳。

贈器之禪師

器禪鄱水來，一鉢自笑傲。偶然家此山，十見青林槁。

寒骨聳詩律枯筆作行草韻如絳闕容日月不能老
伊余曾聞名再見遂傾倒情高付無求語妙知有道
茲山得君居便覺山愈好何時上東巖隣徑雲共掃
時時從君游吐詞覓遺藁

秀上人出示器之詩

川原積雨收餘陰閣新晴一宿古蘭若歸夢有餘清
清辰起危坐笑看煙縷橫讀此阿師詩秀絲出盆明
中有衆谷髓氣和李騎鯨遙知落筆處遶紙風雷生
世無歐陽公意氣相倒傾豈當棄置此終老黃茆坑
雲居道疑大上藍持簡精藉渠一笑起顏綱相拄撐

秀也舊不識一見氣不矜索詩亦不惡寫此抑鬱情
持以示流輩試令俗眼驚

送雷從龍見宣守并序

韓子蒼少時從雷從龍先生游子蒼已入館而從
龍尚高卧廬山之下六喪未葬特詣宣城謁知府
舍人劉公衮公衮僉判在府中作此詩送之

子蒼布衣昨日脫今日便校秘閣書勿驚韓雷相隱
顯今來古孫名姓俱君看守道已華國先生徂徠猶
把鉏嗟君六喪寄空館富人滿前那可棟壞衣懸鷄
無一錢想像郭公四十萬青雲故人氣如春解令寒

谷生和珍江浦買舟春水生片帆何日到宣城府中
若見空青老從渠爲覓詩遺藁

予在龍安木蛇庵除夕微雪及辰未消作詩記

之二首

終夕不自寐老逐客愁長寒歲正折綿歸夢不成往
蕭驚聞打窗氣勢頗春撞地爐對殘缸瓦溝集清響
起看雪覆砌秀色動屏帳歸來簷溜滴生席初未暖
乃知春草微已出嚴凝上但餘蒼苔林落花和月賞
元朝喜見雪一室譁少長新年方下車故歲已長往
和詩如奕棋時時作頭撞知誰徑尋我東墻侵齒響

正當穩靠蒲移几就紙帳宿硯已生冰呵筆藉和暖
一片忽飛來墮我詩卷上爲置石鼎烹茗飲聊同賞

龍安送宗上人游東吳

淮水送君春雨餘刺舟斷岸歸匡廬江南別我秋夫
遠輕囊瘦策游西湖君去復來如社燕我獨留滯如
賈胡牽衣覓詩亦不惡怪君兒戲忘髭須平生千偈
風雨快約束萬象如驅奴飢來一字不堪煮乃知弄
筆輸耕鋤不如尋我舊游處武林清境天下無耐清
不得却來此作詩送君游上都

送充上人謁南山源禪師

老源縛屋磯山側廬山對門江水隔單丁住山二十年一等栽田博飯喫諸方說禪如紡車我口鈍遲無氣力屋頭枯木自安禪生鐵脊梁釘椿直我昔東游曾見之兩頰温然笑渦出到今持夢渡楊瀾浪花漫天浩無極紛紛衲子飽眠卧面如梔子衣領白年年江北與江南誰肯端來尋此客愛君令人肺腸占毛骨含秋眼睛碧能知此老端往尋處處好山留不得作詩贈君終自愧君去我留空歎惜

石門文字禪卷第一

刑部郎中金壇于玉立施刻此卷了緣居士對徐普書端學堯刻萬曆丁酉仲秋徑山寺識

石門文字禪卷第二

宋江西筠溪石門寺沙門釋德洪覺範著

門人覺慈編錄 西眉東巖旌善堂校

古詩

高安會諒師出諸公所惠詩求予為賦用祖原韻

黃塵踏遍江南岸矯首無言對河漢故山有屋埋深雲一夜歸心掣不斷山舟日夜去無休挽繩欲繫慙無由紛紛世態真一夢顧我所為如直鈎綠錦江頭識諒禪傾坐高談象帝先疑君即是僧太白不然無

乃真彌天仙風襲人欲輕舉天容道氣出眉宇擁坐
 衣裳墮不收山水懷雲輕百補我今老倦亦慵參去
 死正如三眠蠶相看一笑有佳約他日同歸五老庵
 人生真若屈伸肘萍浮梗泛因邂逅料君有膽大於
 身未應搜索因詩瘦閒亭夏木初垂陰相逢還得同
 携手未見千首萬丈光先看七步才八斗

次韻汪履道

老來漸覺朋儕少夜室孤禪還自照惟詩垢習未全
 除賴有汪郎恰同調嘗聞從來以類從谷風忽作虎
 應嘯交道今嗟張紙薄老人嘗垂少年約與君一笑

似三秋此道長令洞開廓

次韻李商老匡山道中望天池

幽人修水上春漲冒陂田時時想見之笑頰微渦旋
 往來柴桑間妙語生雲煙廬山自高寒青碧開晴天
 倚藤望絕頂風味如斜川我思從之游子亦當勉旃
 詩成聊假寐歸夢歷層巔

至豐家市讀商老詩次韻

楊柳護橋春欲暗山茶出屋人未知冒田泱泱走流
 水小夫鏟塍翁夾籬雪晴春巷生青草煙濕人家營
 晚炊心疑輞川摩詰畫目誦匡山商老詩夜投村店

想清境蛙滿四隣
簷月移卧看孤燈
心耿耿呼童覓
紙聊記之

送子美友

曉痕翠浪行將遍
掠面柔風初剪剪
梅頰欺寒底死
香柳眼窺煙皺未展
相看感此故意長
欲別忍看春尚淺
離情惱入深造次
撩我小詩弄清婉
腸斷江頭無語中
謝郎匹馬嘶風遠

謝安道花壇

三月江南春不淺
謝家池上開花苑
層壇迸破碧瑠璃
嫩蘂簇成紅婉孌
一枝兩枝和霧白
素娥月下逢

姑射十朶五朶照水紅
仙姝並立瑤池東
人生遇景須行樂
莫使餘香散簾幕
白雪難逃鬢上斑
金樽且對花前酌
醉則傲羲軒醒則歌堯舜
榮辱是非都莫問
風雲際會自有時
忠義果然天不困
君今還作天涯客
憑闌正遇羣芳拆
不挿羣英醉上林
人謂少年真可惜
明年再獻平戎策
順風高舉摩天翼
大手親提却日戈
刈除天下閒荆棘
古人養花如養賢
我今說花心亦然
栽培直欲助真宰
扶持造化工陶甄
時人莫以花爲浼
大都自是人情改
若使人情長似花
相看顏色年年在
謝安道輩真難得
不容蒿艾生牆

側不勞巧手寫丹青不學世人畫墻壁靈苗自有天然格門外溪光長瀉碧更向溪光種碧桃宛然便是神仙宅謝家池館勝瑤臺淺白深紅次第開為報賞花君子道何須東海覓蓬萊

送覺海大師還廬陵省親

老蹤滄海珠道價壓千古莫年還東吳豈不以親故世衰道陵夷學者例頑魯處處如塵沙紛然不容數但誇謝公子乃翁墮江渚坐令乳臭兒高論不少懼安知覆漁舟甚媿編蒲履大師京國來秀色見眉宇笑談出流輩亦自有佳處懷親不能休飲食忘匙箸

醉翁鄉里賢安角誦翁語人老尚康健春寒與秋暑念之凭高樓白雲入瞻顧浩然有歸興掣肘徑馳去遙知到螺江杜林聞布穀迎門一調笑謹極但摩拊童頭想懷橘衣襟應戲舞聊用慰其心高追古人步此詩語散緩細讀有奇趣譬如食橄欖入口便酸苦勿示癡道人被罵吾累汝

送瑜上人歸筠乞食

蜂房蟻穴天魔宮青蓮忽生樓閣重升堂搥鼓集衲子爭看掣電飛機鋒耆年過憂食時至欲學遣化毗耶翁瑜禪聞之粲一笑此老變怪驚兒童我當乞行

等貧富欲使勝利傳無窮出門掌鉢何所詣胡馬舊
聞嘶北風霜清月冷動歸思已覺荷山生眼中會看
對眾捧瓊瑤平等心華含太空

仇彦和佐邑崇仁有白蓮雙葩並幹芝草叢生
於縣齋之旁作堂名曰瑞應且求詩敬為賦
之

宰肉杜樹陰豈無天下志用材樸楔間已有經綸意
欲觀臨大事必自小者耳彭侯偉傑姿要是千乘器
小邑試牛刀不滿一咲喟仇亦何所為睡足時隱几
原多深夜耕門有晝眠吏三年愛等毋百里平如水

政化不自知草木發音瑞論人或多舛唯天不容僞
耿泉豈知忠元乳豈知義應之捷影響物有固然理
此堂濕青紅賓從時畢至應為文字飲視席生佳氣

華裾翠

吏民起獻觴願酬太平醉

居上人自雲居來訪白蓮社話明日告歸作此

送之

浮雲山盡際花木迎春暉佳人殊方來見之消渴飢
藉草坐松影粉香時落衣氣貌秀可掬出語超幽微
巖壁鐘聲寂山陰花發稀去袂挽莫留又作甌峯歸

次韻汪履道

君去中秋猶一缺，爽氣洗開倍明徹。昨夜宵晴獨倚欄，露冷鳴廊卷風葉。百年客舍熟黃梁，夢境偶逢還偶別。擁鼻公豈免百年死灰，我何說故國天涯。眼力衰飛鳥當還倦，始知可憐此別秋。方壯未審重來是幾時。

予與故人別因得寄詩三十韻走筆答之

天不逸羣君獨立，洞徹心宵秋色入於中。堆積萬卷餘筆力，至處風雷集刃游。理窟無金牛，端與腐儒到固執。昔年囊綻露微銛，已陟雲梯最高級。縱令大醉

賦凌雲，玄珠閉眼從頭拾。森張秀骨真神駒，顧盼絕塵那可繫。亦是個中流，恨不識君只依悒。西園道人工文章，覽詩愧歎不復習。野僧頑鈍誰比數，而得聽君論軻伋。別來三月鄙吝萌，聞傳習新詩什。翻瀾妙語驚倒人，氣燄霜鋒光熠熠。此詩初得喜未展，鳥鳴下啄雞得粒。初如積水窺落霞，淺碧穠紅相間輯。又如霜曉聽邊風，十萬軍聲何翕翕。筆鋒正銳物象貧，降旌狼藉詩魔泣。欽欽太白不得儔，倔強退之自莫及。蠅頭細字好生書，為君卷束藏幽笈。嗟予衰老百無能，能園圃自鋤。瓶自汲，人間萬事一笑空流。

年忽忽將三十形骸念念非昔人暗中負法何其急
竭來蹇剝猶可哂兩眼欲昏愁淚澀擎盃專作口腹
謀骨立侯門聽與給舊山歸去成蹉跎半年飄泊留
城邑詩源荒涸如廢池淺穴敗隄微有濕不量更擬
和陽春枯木鑽膏竹瀝汁夜樓無語立西風月華如
水清堪挹君居若耶溪水東我舍秋河半山隈露冷
亦應思故人篋有緹衣餘十襲碧光當戶應可掬頑
翠撐天空業爰撚須落日意無窮片片催詩暮雲歛
知君今作蟠泥翁頭角那能久埋戢妙齡素有廊廟
具破袞煩君重補緝我亦東西南北人從今預可措

杖笠早晚風雲際會時雷震一聲龍起蟄

蒲元亨畫四時扇圖

畫上妙物無不可誰能筆端自忘我醉蒲睡著呼不
聞但見解衣礮礴羸起來漱墨滋破硯霜綃只尺開
紈扇點綴四時無不有但覺眼前紅綠眩雲破連峯
青碧開林梢時復見樓臺斷橋落日空流水爲問秦
人安在哉春山杳靄知何處夏木森森蔽雲雨秋陰
未破雪滿山笑指千峯欲歸去看山對客憶蛾眉客
去愁多自不知滿眼匡廬看畫軸平生坐媿虎頭癡
萬事浮雲定何有白鶴歸來千載後江山長在身世

石門先生集卷二
七
忙歲月不移舟壑走對此未歸心欲折借君玉斧修
圓月會看談笑滿清風詎使人間畏炎熱

贈閻資欽

名都大藩地英俊蔚如林烏靴青衫中時見閻資欽
風度若英特杳然自清深借無軒冕意功名亦相尋
合是廊廟具下僚那敢沉郵亭欵夜語霜清特携衾
篝燈伴清對商略雜古今譬如武庫開錯粲森球琳
詩土出奇麗寫物意在琴絕如歐陽公但欠雪滿簪
句法本嚴甚頗遭韓柳侵願為匿盆麝恥作躍爐金
世無子期耳廣陵誰賞音何當學梅福九江歸雲岑

次韻見寄一首

心親出傾蓋氣合論夙因久已仰高誼竊伏淮海濱
夫子真自重不減南國珍笑談帶富貴翰墨生精神
譬如千江月處處能分身而予續高韻坐客譏效顰
安知磁石針妙處無陳新思君欲夜話痛嗟隔城闔
熟讀寄來詩秀色摩清春便覺海棠兩圓吮爭滑唇
游絲登百尺飛絮沾泥塵要當為設榻敷以白氍巾
看君把麈尾抑氣思舊申涼肝藉苦語激烈敢不遵
次後韻
平生邁往氣醞造次公狂才高簿書縛貌和無歎傷

君看此風味自是萬夫望利害方焚和唾笑皆清涼
穎臯舊廬在頃稻連畝桑時以笏拄頰阻隔如澗岡
少陵功名念看鏡毛髮蒼長哦和秋雨菊林更聞蟹
人生行樂耳萬事付一觴淮南謫天厨太言忘巽牀
吾儕本踈拙閱世忘否臧願言置此喙無處容持括囊
桂賢供火浴龜虛得剗腸一蓑煙雨蝸兩角我耕南
畝君開荒

送通上人游廬山

少年四方志一杖餘艷巾朝來過微雨扁舟買南津
廬山冠天下況復當青春遙知泊星渚雲開蒼翠新

相看發一笑瀑布垂天紳虛漢清月上山空無四隣
應懷千載姿坐榻空埋塵興來得好語錄寄北山人

夏白西園

晚庭一霎過暑雨高林相應山蟬鳴南窓夢斷意索
寞牀頭書卷空縱橫蔬畦日涉已成趣起來扶杖園
中行葵英豆莢小堪摘矮榆高柳陰初成野禽啄果
時落地池塘蓋水新荷平歸來西屋斜陽在原舍尚
聞春籟聲

廓然送僧之邵武頗敘宗族以自激勸次韻

道人秀傑僧中龍揮斤八極轉蒼穹雖然削弱不勝

服童稚亦可堪其曾世人徒見例禿髮安知璞玉混
 鉛銅顧君自是無營者千山何事來忽忽山衣一披
 出松際蕭然自有清散風我狂如君不知恥駕力亦
 須追高蹤作詩頗亦敘宗祖秀氣傑句爭豪雄讀之
 吐舌頸為縮忠義能爾形於中初如迷徑失向背忽
 得車首分西東從來忝直失計置蝟頭但可衲帔蒙
 飯餘便寢百無事可以傲視金蓋重乃今得名齊物
 志激快如鳥初出籠願君勿復忘此語他年吾欲觀
 事功

自豫章至南山月下望廬山

扁舟秋晚離南浦片席搖風望星渚揚瀾大浪晴拍
 天南山窈窕開蓮宇倒墻散策一登臨便擬掩關深
 處住吾生飽食隨東南去亦無求住無取江山得意
 且題詩從游况復皆真侶青燈灼灼夜窗深對牀昨
 聽風甌語忽驚憂患一笑空便覺此生真逆旅隔岸
 廬山金碧開月明尚記曾游處何當乘興更一游興
 闌却向鍾山去

送德上人之歸宗

湓江萬朶真藍潑寒空翔舞狂如活白龍擘開蒼翠
 飛爛銀鱗甲千尋發春巖觸石聲震山金石洪洞奏

深壑野風吹斷蒙山雲松端彷彿遺樓閣中有道人
 如嬰兒頽然一身無所為而今妙譽走天下衲子向
 風爭奔馳自嗟匏繫天一角睫交去夢渺難追何時
 再拜觀珠玉激昂吐我曾中竒上人今向山中去明
 年應到雲生處紫霄峯下如相逢持我此詩煩寄語
 夏白陪楊邦基彭思禹訪德莊烹茶分韻得嘉

字

炎炎三伏過中伏秋光先到幽人家閉門積雨蘚封
 徑寒塘白藕晴開花吾儕酷愛真樂妙笑談相對興
 無涯山童解烹蠲眼湯先生自試鷹爪芽清香玉乳

沃詩脾杼紙落筆驚龍蛇源長浩與春漲激力健清
 將秋蒸嘉須臾杳幅亂書几環觀朗誦交驚誇一聲
 漁笛意不盡夕陽歸去還西斜

贈李敬修

荷山錦水靈秀鍾半千嘉運生英雄李郎年少韻洒
 落天容道骨軒仙風下惟默與賢聖對鈞深索隱皆
 旁通肝腸盤屈疊麗錦心胷洞徹光玲瓏文章氣欲
 長萬丈那應筆夢生春虹桂枝未折白丹窟麻衣尚
 走紅塵中巖僧素有孝基眼觀人雖衆無如公昂霄
 聳壑跬可待行行不用啼途窮

贈王性之

性之自是英特人唯恐富貴來逼身我非寶公亦識
 子地上復見天麒麟眉間爽氣照秋色山水頓覺生
 精神曾中撐拄萬卷讀對客傾瀉如崩雲不恨子未
 識和仲但恨和仲未識君道山歸計儻可緩且復白
 恰拖紅塵他年攜我渡弱水僥倖一看瀛洲春詩成
 笑答千巖響東崦峰頭湧玉輪

次韻性之送其伯氏西上

乃翁純孝曾種玉一雙秀榦森如束憶昨同舟游鄴
 都鬢鬚尚帶廬山綠只今追想如夢魂更堪哦子陽

關曲霜蹄暫蹶堪一笑連壁終當照金屋且醉山中
 浩蕩春錦繡誰同賞雲谷

次韻余慶長春夢

阿環夢回如墮雲視中玉纖如醉文香囊翠被不復
 見華清草木猶醺醺仙郎春光洗懷抱柔情不斷如
 芳草軟風細漲玉橫斜一尾追風北山道詞鋒落紙
 磨秋霜千首今餘萬丈光從來支道識神駿歲月不
 知君意長

讀慶長詩軸

韻如春水初含風秀如蘭芽新出叢人間何從有此

客坐令衰老忘龍鍾新詞鏘金紛滿眼妙語屑玉霏
 無窮讀之置卷欲仙去風度絕似歐陽公儒生寒酸
 不上眼江南風流翻手空那知此郎蹶然起筆端五
 色回春土只今陛下固天縱文章星斗懸高穹天生
 堯舜稷契王君宜置在明光宮雪中呵手研破硯詩
 成一笑天開容

同慶長游草堂

萬株蒼煙間杳然出微徑相逢知有得一笑洗孤憤
 蕭蕭半窓雨終日滿風聽綠雲到曉絕小立銳清興
 約公我輩人發此一區勝春土自無私風力亦強敏

柳垂拂掠黃溪作措磨淨籬間殿寒梅吳姬發微哂
 已忻鳥聲樂更愛游絲迥余郎妙天下氣與山嶽峻
 春光纏肺腸霽月磨風韻詩如畫好馬落筆得神駿
 日斜與未闌山窮春不盡更為明日游踏遍鍾山頂
 旋汲一人泉峰頭煮春茗

慶長出仲宣詩語意有及者作此寄之

我有忘年生氣韻亦秀拔豈惟有詩癖亦醉凌波鞵
 平生慎許可期期不忍發但餘說仲宣十常在七八
 袖中出清詩韻字清到骨遙知亦說我喜氣見鬚髮
 相思一水間楚岫出毫末昨夜西風高凭欄暮天濶

識君定何時目送孤鴻沒

送慶長兼簡仲宣

君詩秀氣終不沒長吉精神義山骨諸公貴人亦識
面想見宗之雙鬢綠嗟予棄置卧空山索寞何人著
眼看高軒一日肯過我誇聲萬口鋒刃攢當時見君
喜不徹喜中便知有此別秋風雲帆十幅開石城浩
蕩天水接淮南不獨江山勝國士英才從古盛期與
高人馮仲宣小字同聯寄我篇

吳子副送性之詩有老子只堪持蟹螯之句因
寄之

秋來殘暑猶頑賴推擠不去吁可怪哦君妙語齒頰
清冰壺照入吐精彩絕知此公風味高想見尊前持
蟹螯說禪不用朱藤杖看月却披官錦袍太藩衣冠
蔚城市君所過從天下士忘懷一笑餞年華醉裏千
篇是生計相知何必蓋須傾此語荒唐却甚真人生
懷抱要磊落他年相逢是故人

高氏釣魚臺

當時呂望要周室渭水垂綸恣遺佚後來嚴陵傲漢
家七里灘頭釣月華一賢一旦弊隱淪當年平步升
青雲至今蹤跡耀經史千載何人能繼此宜陽高人

真賢族構亭仍以釣魚目時人盡詠釣魚詩獨我來
 歌釣魚曲君不見吳山青湘水綠唯愛夏絃春誦聲
 相續以軻雄百氏為絲綸以周孔六經為餌屬遇時
 伸不時縮人言君釣魚我言君釣祿盛代兒孫滿場
 屋前春舉手得鯨鼈猶恐主人心不足

李德修以烏蘭河石見示

并序

予友李德修少豪逸有美才工文章一時輩流推
 之聲稱著場屋紹聖初選於廣文至禮部好惡不
 合有司棄去游邊往來蘭會甚久晚屏跡田園然
 視其氣貌精特功名一念未置也政和七年上元

前四日過予袖中出美石一掬大小二十八枚有
 紅青碧綠色細視之有旋螺紋如人指紋以誇予
 曰吾嘗與諸將至古烏蘭大河河中有洲隣夏國
 此石得於大河洲中其為我賦之予為大笑曰君
 同時輩流皆踐清華為顯仕躍馬食肉久矣獨從
 予山中食脫粟玩朽石不亦大迂闊哉然德修以
 予言為非作詩以還其石

烏蘭洲塞夏國口大河天來箭激溜排空但聞地帶
 吼勢撞石壁欲穿透石堅捍之不肯受顛雷濺雪喧
 夜晝千年石骨亦不朽碎為青紅雜怪醜疆場久空

爛甲胃舉觴天子千萬壽李侯橫槊千騎後望雲賦
 詩劍礙肘徐涉河流馬俯馱下馬得之等瓊玖萬里
 來歸亦何有出以示我為拊手笑君兒嬉忘白首李
 侯氣如春在柳大河西虜置懷袖君徒自珍世不售
 敲門那能易升斗功名偶然夢豈以道人乃爾自薄
 厚此石笑汝汝慚否

次韻君武中秋月下

秋光一半去無迹萬里陰晴占此夕書生醉語哦月
 詩想見看朱眩成碧白公初携佳句歸便覺草露寒
 露衣夜晴蘭室亦懷古領略太白懷玄暉千字一揮

纔瞬息流珠走盤紛的皜故應奇韻自天成此詩如
 女有正色風鑒從來別俗氛吐詞句句含煙雲坐令
 一日傳萬口不減長吉題高軒君家客皆天下士放
 意高談飲文字江左風流掃地空今日追游可無媿
 嗟予禿鬢欲逃名竭來百慮霜雪凝世間垢習揩磨
 盡但餘後鶴哀吟聲劉生食茄亦何美玄德結胎應
 有旨平生清境吾所嗜正如翔鸞飲須醴君看清河
 夜升鏡微雲滅盡如磨瑩定當先生度青冥思冷竟
 澄亦幽興笑中筆陣橫詞鋒照人秀色煙茸茸調高
 未數紫芝曲酒美且卧黃金鍾人生一笑如電掣豈

特山舟藏歲月自慙陋句類無益敢並高人天下白

七月七日晚步至齊雲樓走筆贈吳邦直

錦江風晚吹征裘幽人詩思過不休心知無處可告
訴掉臂直上齊雲樓凭欄展目時一快萬山奔走趨
簾鈎回頭下視茫茫者龜囚蠶縛令人愁樓中夫子
神仙流道容玉頰紅光浮少年讀書浩江海回春妙
語生筆頭致君終使堯舜止大作一雨蘇林丘深山
野僧拙筆語作詩欲贈煩冥搜艱苦思索得箇字謹
用持上君牢收謝安昔與支遁游及其貴也加綢繆
高風氣識正相侔他年身退百無憂復來把臂登此

樓軒渠一笑三千秋

王表臣忘機堂次蔡德符韻

風埃九陌吹冠巾凍蟻旋磨無富貧憂患著人骨肉
隔奔勢熏天吳楚親何妨社櫟神其拙壑舟不暇供
歲月句法不醫霜鬢秋邇來覽鏡益垂雪蔡侯大家
言不誣筆端五色圖空虛酒闌耳熱題詩處豪放超
逸先鋒車古來百局坐竒智並頭暗中爭射利對人
含笑真含沙幻影浮屠同一世世味甘於澹蜜力舐
之割利那可逃癡兒坐守忘啼哭乃欲避就空勤勞
君看秋風秀江叟枯木形骸外塵垢屋下沙鷗交友

同耳邊勝利蚊雷吼水光綠靜山青葱意行回反遭
 路窮莞然一笑答山谷忽見幽林小徑通我詩贈君
 無襟句碧灣明月不可取游人欲上忘機堂請哦蔡
 侯醉時語

贈巽中

道人少小來廬山水光山色供盤餐坐令山水秀傑
 氣繚繞曾中成塊搏我初未識已嗟駭誇聲萬口鋒
 刃攢故人坐上適相值妙語生我世間歡新詩脫口
 劃如霓奮毫狂赴龍蛇鑽翩翩奕奕出意外慄然茅
 屋翻狂瀾切疑湯休蹲舌底又疑醉素戲筆端作詩

問君覓奇字留待老年俛首看

寄巽中

熏風度南枝餘芳委紅綠微雲生晚陰梅雨淨林麓
 穿花鶯語遲翻泥燕飛速遐想幽人居夢過俛溪曲
 清聲久絕耳斯懷抱煩燠仰道思彌高哦詩出凡俗
 脫屣滿戶外輪蹄日相逐吾徒不得人大法世陵叔
 智刃剪蒿蓬利鋒揮樸楸念往造前席初筮不我卜
 別來空相思徒倚蒼山木懸知清興多銀鈎墮盈軸
 願得三百篇遺我藏諸積如彼知音知價不低金玉

次韻聖任病中作

君詩素雄放出語秀不俗更讀病中吟清婉猶可錄
 自愧魯鈍者文字每見辱有取定鄉間餘事亦何足
 夫子飽書史屢曬便便腹蓄深故發遠詩成驚衆且
 我詩雖不少俗馬空多肉賴遇禿毛髮苟仕安得祿
 所至有青山是處堪藏育行當拂衣去此志吾已下
 君須更勉旃當以謙自牧功成還故鄉竹杖巾一幅
 永從林下游此詩無厭讀

何忠孺家有石如硯以水灌之有枝葉出石間
 如巖桂狀為作此

君不見海門比丘海為家說法光明生齒牙坐令十

二緣生浪幻出定慧青蓮華又不見佛圖澄師氣邁
 往披拳山川俱在掌從來身世無一法勿作情與無
 情想何如巴丘老居士聲名雷霆喧一世邇來趣味
 等頭陀山中兒嬉雜童稚宅相天藏公發之卷簾萬
 山登睫眉囊除得石大如硯中有傲霜巖桂枝婆娑
 望之花六出熟視直氣終不屈言不得意以象傳桂
 枝馨香石介然

余方登列岫愛西山思欲一游時阜上人來覓
 詩作此

西山層翠長倚天我來正及社燕前城中高閣時縱

倚妙語已復凌芳鮮方將結伴未有侶而子乃敢犯
 衆先會當披雲亂峯頂却下濯足寒澗邊遙知笑語
 山答響詩句時作何必編就巖折桂亦細事海棠爛
 熳燒晴川歸來仰屋念清境夜未央兮猶不眠此詩
 未到已如見戲為圖畫人間傳

饒德操營中客世與淵才友善有詩送之予偶
 讀想見其為人時聞已薙髮出家矣因次其

韻

吾聞彼上人不惰不精進觀其吐詞氣人品極爽俊
 邇來效冊霞裂冠鏹須鬢高才固難容世議久迫窘

想於龍象群眉宇發奇韻淵才幹國器美若兵厨醞
 平生至孝節初不愧虞舜相逢大梁城連榻盡底蘊
 如開衡嶽雲仰此摩天峻此詩為渠作崖略見筆陣
 把玩立東風料峭應花信明窓小字臨握管腕不運
 愛君透真境邁往無顧徇脫身索寞濱洗我岑寂憤
 掉頭一長哦語卒意未盡

次韻平無等歲暮有懷

文章有神驚穎脫風雷先聽毫端落窮年秀氣不知
 休此蓋道餘德之粕大人見世當有馭一枝區區何
 足托此語令君意自消雙眸新退重重膜鼻端餘地

大於天揮斤請看無沾聖吟詩寫字到骨清寓意乃
佳工折莫我年十五恃豪偉廢食忘眠專製作人令
瑕玷混吞聲將使駭世驅時惡那知任已返吾病邇
來猛省能自薄默啓僻處兀聾癡十問煩入慵一答
聚呵隨罵嗟愚狂不詳乃背初心約我不怪君亦不
嗔君獨何心性喜躍人生異趣各有謀分定那可相
更博君不見謫仙歷落解全真月下尊堂獨酌又
不見淵明坦率從所好悶遭五斗相纏縛矧予於世
百無求紛紛固可俱拋却歲月更如秋晚池草木向
枯泉欲涸行看東風顛沛來又麗繁紅入斜曩

送濟上人歸漳南

密林影群陰露葉光翻夕幽人獨經行滿院許秋色
幾年涉嶺海頗亦歷佳席邇來寄江寺癡坐室生白
吾家在漳南萬頃蒼玉壁何當附舶歸重拂林下石
此生一夢耳夢覺試尋繹倚筇作長嘯萬事付鳥迹
若有閒中吟無惜寄飛翼

送能上人參源禪師

我昔游東吳曾過南山寺一識山中人知是黃龍子
超然精悍姿曉日出塵滓坐令平生懷未吐心已死
別來今十載歲月乃如此近聞歸南都老色更豐美

遙知君見時機妙乳生水道眼真鷺王棟辨不容擬
 應怪納飯師趕逐倒脫履萬象爭驚吁虚空笑啓齒
 却歸下板頭破衲蒙凍耳他日重相逢煩君再指似
 夏白雨晴過宗上人房

仲夏林木深古寺雨初足殿閣風颯鳴閒庭草空綠
 小軒試凭几解籜愛新竹點筆記題詩粉色不受觸
 道人有佳處面數良以熟脩然亦無營來往相追逐
 此時偶相值一笑天宇局何當烹壑源看此粟米粥
 次韻權巽中送太上人謁道鄉居士
 我讀瘦權詩起舞忘華顛疑與雪溪畫句法爭後先

遙知清嘯處逸氣生雲泉聊將笑時語乞與人間傳
 思君發遐想瘦坐如癡禪便覺香爐峯青碧開連天
 太禪十年舊生計良蕭然清辰一鉢外昨有三根椽
 偷笑癡種子夢幻供肥鮮鍾山領略游相值衡門前
 將謁道鄉老巨浪翻吳船想見笑撫掌衣裾雪花湔

南昌重會汪彥章

彥章退然才中人譏訶唾笑皆竒偉看君落筆挾風
 雷渙然成文風行水坐令前輩作九原子固精神老
 坡氣儒生寒酸不上眼此郎要是天下士嗟予生計
 等飛鳥翩翩吳頭復楚尾去年興發看京華笑傲清

狂人背指君獨折簡坐致我迎門歡笑自挈履舊聞
 牛鳴馬不仰女逐臭夫那有理今年黃花南浦岸忽
 然見君失聲喜僧房借榻管夜語燈火照人如夢寐
 懷中卿相且袖手翰墨風流聊戲耳行看上書苦塊
 中凜凜范公只君是

贈王敦素兼簡正平

空山無人舟壑移坐看香燒行篆畦兄弟華軒肯過
 我墮甃弊簾生光輝著屐登山亦不惡携被假宿良
 幽期燈前綠髮映玉頰風流未數崔宗之夜談詞辯
 出神駿頓塵赤兔真權奇我欲置君帥河朔軍前千

騎紅粧隨望雲題詩付橫梁玉帶錦袍英姿又欲
 置君玉堂卧霧窓斐几春晝遲醉中草制敏風雨諸
 公堵立相嗟咨微吟擁鼻笑不語恐未免爾無多辭
 為君張燈掃東壁他日重來讀此詩

贈黃得運神童

君初髮齊眉玉頰照秋光誦詩巨萬紙一目俱五行
 不信同舍兒所閱隨廢忘姓名入清禁詔落銅山陽
 十三見天子奏對允且詳翻瀾誦五經如水傳觥觴
 環觀共嗟異朱紫如堵堵華裾小旋製初掛煩官粧
 歸來汝水濱夾道萬夫望指目無雙裔吟嘖有此郎

異態懸睿想行看登廟堂那知事齟齬放浪魚稻鄉
顧我與君別忽忽移十霜更逢石門下美髯如許長
抵掌話夙昔夜語響山房古人當大謬噪索失其常
夫子獨何得坦率追羲皇乃為任重器愈抑道愈昌
作詩以壽君他日未易量功成徑歸來復此山水傍
幅巾青杖竹卒歲以徜徉

石門文字禪卷第二



刑部郎中金壇于玉立施刻此卷海蓋了緣
居士對長洲徐普書建陽鄒友刻
萬曆丁酉仲秋徑山興聖萬壽禪寺識

